

In ambassadur scriva biografias

Benedikt von Tscharner preschenta ses nov cudesch

■ **(gsc) Ils patrizians von Tscharner, da derivanza grischuna, èn documentads dapi 1530 en la citad da Berna. Scoblers aristocrats da l'«ancien régime» savevan els fitg bain la lingua da Versailles.** L'istoricher Vinzenz Bernhard von Tscharner (*1728 Berna – †1778 Aubonne/VD) ha translàt en franzos las poesias dal medi e botanist Albrecht von Haller (1708–1777). Dapi 2002 maina l'anteriur ambassadur Benedikt von Tscharner il museum dals Svizzers a l'ester en il chastè da Penthes (Pregny-

Chambésy/GE); sco tal ha'l publictà en franzos e tudestg biografias da l'emigrant Albert Gallatin (1761–1849), dal diplomat Johann Konrad Kern (1808–1849) e da cuss. fed. Giuseppe Motta (1871–1940). Von Tscharner ha manà las delegaziuns svizras tar las Cuminanzas europeicas (1987–1993) e l'Organizaziun per la segirezza e la collavuraziun en Europa (1993–1997). 1997–2002 è'l stà ambassadur a Paris. Puspè per franzos e tudestg ha'l gist publictà ina racolta da biografias curtas d'umens da stadi, diplo-

mats e politologs (1). L'Archiv d'istorgia contemporanea tar la Scola auta politcnica da Turitg (AIC) e la Societad svizra da politica exteriura envidan a la preschentaziun da lez cudesch nov mesemna, l'emprim da favrer 2012 a las 18.00. L'autur discutescha cun Daniel Trachslener, politolog e biograf da cuss. fed. Max Petitpierre (1899–1994), sco era cun Luzi Bernet, redactur da la «NZZ», e Gregor Spuhler, schef da l'AIC; quest supplitgescha las persunas interessadas da s'annunziar ordavant per l'occurrenza

(2). I vala segir la paina d'ir a dudir in publicist erudit e plain experientscha discurren cun persunas expertas davart persunalitads istoricas ch'ins enconuscha savens memia pauc.

1. Benedikt von Tscharner, Inter Gentes. Staatsmänner, Diplomaten, politische Denker. 1292 Pregny-Chambésy/GE (Editions de Penthes) 2010.

2. Adressa: Archiv für Zeitgeschichte, Hirschengraben 62, 8001 Turitg. Tel. 044 632 40 12. Fax 044 632 13 92. Posta electronica: afz@history.gess.ethz.ch